

Gvangjsih Minzczu Bau

Cawjguenj: Gvangjsih Bouxcuengh Swcigih Minzczu Cunghgyau Swvu Veijyenzei

Cawjbanh: Gvangjsih Minzczu Bause

Geiz neix 8 banj

广西民族报 Aenhauh okbanj: CN45-0036 B.2025 Nd.6 Ng.18 Liggaueq ietceih nienz ndwenngux ngeihsam Geizsoq: Gungh daih 3673 geiz

Bineix Gih Raeuz Ciusou 1571 Boux Swhfanswngh Doegsaw Mienx Cienz

Bonjbauq siusik(gicej Cau Dwzfeih) Mboengqneix, gicej cam Swcigih Gyauyuzdingh rox, Gvangjsih yaeq coh daengx gih ciusou bujdungh gauhcungh haidin seiq bi bwnjgoh deihfueng swhfanswngh mienx cienx 1571 boux. Ciuq gvidingh, boux bauqgauj aeu dwg vunz Gvangjsih bujdungh gauhcungh bizyez, mbouj hanh dieg, cinj hamj si, yienh(si, gih) bauqgauj; ndawde, swhfanswngh dinghyiengq mwh youq hagdangz doegsaw mienx cienzhag, mienx cienzdozninz, caemhcaiq ndaej cienz boujdiep gwndaenj dem.

Ciuq ciuseng dajveh, hagdangz son'gyauq miz 10 aen, faenbied dwg Gvangjsih Swhfan Dayoz, Gvangjsih Minzczu Dayoz, Nanzningz Swhfan Dayoz, Bwzbuwanh Dayoz, Yilinz Swhfan Yozyen, Bwzswz Yozyen, Hocouh Yozyen, Gvangjsih Minzczu Swhfan Yozyen, Gvangjsih Gohgi Swhfan Yozyen, Gveilinz Swhfan Yozyen. Ciuseng ciennieb cawz siujyoz gyauyuz, siujyoz gyauyuz (Sawcuengh Vahcuengh fuengyiengq) 2 aen ciennieb, suyoq caeuq wngqyungh suyoq, Yinghyij, vuzlijyoz, swnghvuz gohyoz (rox swnghvuz gisuz), dilij gohyoz, vayoz,

yinhoyoz, meijyoz, diyyuz gyauyuz, sinhljyoz (rox wngqyungh sinhljyoz), gohyoz gyauyuz daengj ciennieb cungj faen hagduen dinghyiengq son'gyauq.

Diuzgen dwg gaujseng aeu ganyienh bauqgauj aen ciennieb dinghyiengq son'gyauq guh lauxsae, caiqlij baujingq bizyez le ei bae dinghyiengq yienh (si, gih), daengz dinghyiengq yienh (si, gih) youwzyenz rox hagdangz yivu gyauyuz lajmbanj rox gauhcungh hezyi iekdingh haenx guh lauxsae ceiq noix 6 bi. Linghvaih, lij aeu camgya Gvangjsih bi 2025 bujdungh gauhgauj dungjgauj, gauhgauj faensoq daengz diuzsienq faensoq ceiq daemq bi 2025 Gvangjsih bujdungh gauhyau ciuseng loegaeu doxwngq buekbaez haenx; boux gaujseng bauqgauj yinhoyoz, meijyoz, diyyuz gauhcungh haidin bwnjgoh ciennieb, aeu camgya Gvangjsih bujdungh gauhyau ciuseng yisuz dungjgauj doiqwnq goloih gaujsi rox diyyuz dungjgauj, caiqlij gaujseng gauhgauj faensoq caeuq yisuz dungjgauj rox diyyuz dungjgauj cingczik cungj daengz diuzsienq faensoq ceiq daemq loegaeu bi 2025 doxwngq loihibied bwnjgoh

buekbaez haenx; caeuq ciennieb wngq mbouj doengz, boux gaujseng bauqgauj siujyoz gyauyuz (Sawcuengh Vahcuengh fuengyiengq) ciennieb aeu ginggvaq dangqnaq gaujsi, caemhcaiq aeu rox gangj Vahcuengh (baugvat gak dieg vahdeihfueng Vahcuengh).

Ciuq gvidingh, swhfanswngh dinghyiengq ciuq bujdungh gaudaengj hagdangz yozciz guenleix banhfap guenleix, bi daihngieh doeg sat, youz aen hagdangz gaujhaed swhfanswngh dinghyiengq, boux gaujhaed mbouj habgek siu gij swhgwz doeg ciennieb swhfanswngh dinghyiengq bae; boux gaujseng bauqdoeg ciennieb dinghyiengq son'gyauq ndaej loegaeu le, mbouj ndaej doiqding, mbouj ndaej cienjhag, mbouj ndaej cienj ciennieb, mboujnex bihaenx mbouj caiq loegaeu; boux hagseng doeg bizyez aeundaej mbawcingq bizyez bujdungh gaudaengj hagdangz caeuq mbawcingq miz swhgwz guh lauxsae, bae hagdangz hwnjdangz le, mizgven gihgou benhci, yinzliz swhyenz sevei baujcaang daengj bumwnz ciuq gvidingh banh mizgven loegyung soujsuz.



Gvangjsih Gveicouh Daz-fwngz Cauh Minzczu Doxgiet

Bonjbauq siusik(gicej Vangz Yigiz) 6 nyied 14 hauh, bi 2025 "minzczu doxgiet" ciet angq minzczu vwnzva lai yiengh Gvangjsih Gveicouh" baenzroix hozdung youq Nanzningz Si Duzsuhgvanj hainduj. Hozdung neiyungz lailang, miz langhbaij buhvaq minzczu vwnznoix, dwkcik, dwkdom, daenj haizgieg doxdax doengh gij neix. Baez hozdung neix yienh'ok Gvangjsih Gveicouh song dieg aeu vwnzva guh sai, aeu doxgyau coi yungzhab. Hozdung mboujdan daplaeb aen bingzdaiz moq hawj Gvangjsih Gveicouh song dieg doxgyau vwnzva, hix dwg gij saedguh couqmaenh gij eiqsik Cunghvaz Minzczu ranz vunz ndeu. Ndaw doz dwg lwgnyez sawq dwkdom.

Gvangjsih Baez Nduj Coengh "Liuz Sanhcej" Laebguh Vwnzva Dangjanq Caemhcaiq Langhbaij OKdaeuj

Bonjbauq siusik(gicej Veiz Yingjcinh) Mboengqneix, "minzczu dijbauj cien bi ndaejgeiq" langhbaij vwnzva dangjanq Liuz Sanhcej" youq Nanzningz guh, hozdung dwg Swcigih Dangjan' gvanj, Nanzningz Si Guekgya Dangjan' gvanj lienzhab cawjbanh. Ciuq cam rox, neix dwg Gvangjsih cwngfuj caengzmienh baez nduj coengh Liuz Sanhcej laebguh vwnzva dangjanq caemhcaiq langhbaij okdaeuj.

Baez langhbaij neix yungh dangjanq langhbaij Liuz Sanhcej guhlawz daj gij cienznaeuz ndawbiengz, bienqbaenz gij yiengh bouxvunz caensaed, caiq hwnghat

baenz aen binjbaiz vwnzva gak cuz bouxminz haenggyaez, cungfaen langhbaij gij saehbaenz mbaw mingzben vwnzva Liuz Sanhcej liggaig Swcigih Dangjveij, Cwngfuj roengzsim ganq haenx.

Baez langhbaij neix faen ding hainduj, Liuz Sanhcej ndaw vwnzyen sijliu, Cungguk moq laebbaenz le Liuz Sanhcej vwnzva hwnghat, gajgwz hailangh le hwnghat mwnhoengh Liuz Sanhcej vwnzva, seizdaih moq cienzswnj caeuq cauhoq Liuz Sanhcej vwnzva 5 aen banjgvai, doenggvaq 300 lai faenh dangjanq vwnzyen dijbauj, langhbaij Liuz Sanhcej vwnzva goekgaen, hwnghat

caeuq mwnhoengh, aeu neix gangj ndei gij gojgaeq Cungguk goekrag youq Gvangjsih haenx, gyaak Cunghvaz vwnzva gagsaeng, coengh fugsah Gvangjsih hwnqguh aen gih guhyiengh couqmaenh gij eiqsik Cunghvaz Minzczu ranz vunz ndeu ok gij rengz dangjanq.

Ciuq gaisau, baez langhbaij neix doxgaiq baugvat heiqbonj fwngz cau, sawgeq vwnzyen, mbawsiengq, yingysieng swliu doengh gij neix, ndawde miz ca mbouj lai 100 gienh Liuz Sanhcej vwnzva dangjanq dwg baez nduj oknaj. Ndaw ding gajq doxgaiq ceiq geq, dwg cek saw «Sawcuengh Gaeuq» bi 1914 Sanghvu

Yinsuhgvanj okbanj haenx, liz seizneix gaeng miz 110 lai bi lizsij. Lijmiz mbangj di doxgaiq hix dijbauj, lumjbaenz heiqcaijdiu «Liuz Sanhcej» heiqbonj fueng' anq daih' it nyuenzgauj; bi 1960 mwh heiqgofoux «Liuz Sanhcej» haeuj Ging yienjok, mbawsiengq bouxyienj heiq yienj sat caeuq Cuh Dwz, Vuhlanzfu, Dwng Yingjcauh doengh gij vunz neix youq Cunghnanzhaij Vaizyinz dangz hab' ingi; gij vwnzgen bi 1963 Vwnzvabu baefuk doengzeiq coh Yindunzsihya Vazgyauz gunghawj «Liuz Sanhcej» mizgven swliu daengj, ciuyinx haujlai vunz daeuj yawj.